

Oqaluuserisassanut nassuiaat

(Inatsisartut Siulittaasuat)

Ippassaq marlungornermi ulloq 22. oktober ataatsimiinnitsinni oqaluuserisassani immikkoortut 57, 128 aammalu 145 angumerinngitsoorparput, taamaattumillu ullumi ataatsimiinnermi oqaluuserineqartussatut ingerlateqqinneqarsimallutik.

Immikkoortut pineqartut tassaapput:

Immikkoortoq 57: Namminersornerullutik Oqartussani, Kommuninilu nunatsinni tjenestemandit pillugit Inatsisartut Inatsisaata § 55-ip imm.1-ip allanngortinneqarnissaanut tunngasumik nalunaarusioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaaliornikkut nunatsinni tjenestemandit, danskit naalagaaffiata nunatsinni tjenestemandinut malittarisassai malillugit tjenestemandisut soraarnerussutisiaqalersinnaaleqqullugit, taamaattorli tapeqartitsisoqassalluni soraarnerussutisiaqaataasussanit aningaasarsianinganiit %-mik aaliangersimasumik angissusilikkamik, taamaaliornikkut nunatsinni, qallunaat nunaannilu tjenestemandit soraarnerussutisiaqarnikkut assigiinngissutaasup nalimmassarneqarnissaa anguniarneqassalluni. Naligiinngissutaasooq nalimmassarliarlugu, tapeqaataasussap qanoq annertutiginissaa aammalu kommuninut, namminersorlutillu oqartussanut qanoq aningaasatigut naleqassanersoq nalunaarusiami UKA25 sioqqullugu tunniunneqartussami ersarissarneqassaaq. Tamatumuungattaq ilanngullugu nunatsinni qassit, tjenestemandinut isumaqatigiissut naapertorlugu atorfinitsinneqarsimanersut nalunaarusiami ersarissarneqassaaq.

Immikkoortoq 128: Peqqinnissaqarfik Region Nord patienthoteleqalernissaa pillugu Naalakkersuisut UPA2025-mut agguassassamik nalunaarusioqqullugit peqquneqarnissat pillugu Inatsisartut aalajangiiffigisassaattut siunnersuut.

Immikkoortoq 145: Sullissinerit suut sumiiffinnilu suni neqeroorutigineqarnersut innuttaasunit qaqugukkulluunniit nalorngissutigineqaqqunagit peqqinnissaqarfiup sullissinerinut takussutissiap tamatigut nutarterneqartuarsimanissaa ullutsinnullu naleqqussarneqartuarsimanissaa qularnaarniarlugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

Taasisarnerit pillugit uku akornanni isumaqatigiissuteqartoqarpoq:

Aqqalu C. Jerimiassen, Atassut aamma Mimi Karlsen, Inuit Ataqtigiit.

Múte B. Egede, Inuit Ataqtigiit aamma Knud Mathiassen, Naleraq.